

四庫全書

史部

欽定四庫全書

史部

皇朝文獻通考卷二百二十五至
二十八

中書_臣張經田覆勘

總校官檢討_臣何思鈞

欽定四庫全書

皇朝文獻通考卷二百二十五

經籍考十五

子

臣等謹按諸子之名昉於七畧至荀勗以兵書術數方技併入乙部而其類愈繁馬端臨通攷依倣前志自儒家至雜藝術分二十有二門顧陰陽房中二類皆有目無書名家墨家縱橫家即存書亦

藝五朝續通考謹遵

欽定四庫全書之例闕之餘皆依類詮次惟譜錄一門
增馬氏之所無茲所編輯亦分為一十八門首儒
家次法家次雜家次小說家次農家譜錄次天文
推算五行占筮形法次兵家醫家次類書次雜藝
術至于道家釋氏神仙別有專藏惟取其有資掌
故者慎而錄之附見于後猶四庫全書例也夫六
藝之支流沿為諸子掇其精要原可與經史相參

我

國家文教誕敷尊崇正學先儒論說經

列聖之表章學者仰如星日奉為槩矚其他卮語鈴書醇
疵互見而小道可觀有足以晰理致資考鏡者咸
著錄云

子
儒家

御定資政要覽三卷

順治十二年

世祖章皇帝御撰

世祖章皇帝御製序曰朕惟帝王為政賢哲修身莫不本於德而成於學如大匠以規矩而定方圓樂師以六律而正五音凡古人嘉言善行載于典籍者皆修己治人之方可施於今者也朕孜孜圖治學于古訓覽四書五經通鑑等編得其梗概推之十三經二十一史及諸子之不悖于聖經者莫不蘊涵事理成一家言但卷帙浩繁若以之教人恐未能一時盡解其義亦未能一時盡

得其書因思夫記事宜提其要纂言當鈎其元乃採集
諸書中之關於政事者為三十篇又慮其渙而無統於
是每篇貫以大義聯其文詞于忠臣孝子賢人廉吏畧
舉事跡其貪姦不肖悖亂者亦載其內使法戒炯然加
之訓詁詳其證據譬之萃衆白以為裘範六金而成鼎
旨約而易明文簡而易閱名曰資政要覽觀是書者熟
思而體之可以為篤行之善人推類而廣之可以為明
理之君子毋徒求之語言文字之間則朕諄諄教諭之

心庶乎其不虛矣

臣等謹按順治十二年大學士呂宮等奉

命恭纂是書凡三十章曰君道曰臣道曰父道曰子道曰
夫道曰婦道曰友道曰體仁曰宏義曰敦禮曰察
微曰昭信曰知人曰厚生曰教化曰儉德曰遷善
曰務學曰重農曰睦親曰積善曰愛民曰慈幼曰
養生曰懲忿曰窒慾曰履謙曰謹言曰慎行曰愛
物每篇箋註皆出自

聖裁擷義理於六經寓勸懲於百史凡修身齊家之要反復詳明仰見我

世祖章皇帝大業初開

勵精宵旰于以敦崇政本俾朝野咸知所激勸而共躋太平者信天下萬世所宜法守也

御製勸善要言一卷

世祖章皇帝御撰

世祖章皇帝御製序曰朕惟天道至善即以其善賦之下

民故人之生無有不善其或有不善者皆因內蔽于私欲外染于污習遂失其繼善成性之本體而日遠于天矣因人之存心行事不同是以

上天鑒察降以災祥其降祥者固以顯佑善人其不得已而降災者亦以明戒下民使之改過而遷于善也從來報應昭昭不爽詎不可畏哉古人原天垂訓以教天下正論嘉言不一而足但文之深者或不易通言之簡者又不能盡朕恭承

天命撫育萬方深念上之教世勸善為先人之立身為善
最樂故取諸書之要者輯為一編名曰勸善要言語不
欲文期于明理詞不厭詳期于曉衆欲使賢愚同喻小
大共知讀此書者當深思其義反之于心體之于身善
者則益當加勉而進于淳良以求吉慶其或無知而誤
染于不善者尤當速改而歸于無過以免災戾庶幾不
負

上天好生之心而朕殷殷教化之意亦不虛矣凡我人民

其敬勉之哉

聖諭廣訓一卷

世宗憲皇帝恭纂

世宗憲皇帝御製序曰書曰每歲孟春道人以木鐸徇于路記曰司徒修六禮以節民性明七教以興民德此皆以敦本崇實之道為牖民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六

十年來宵衣旰食祇期薄海內外興仁講讓草薄從忠
共成親遜之風永享昇平之治故

特頒上諭十六條曉諭八旗及直省兵民人等自綱常名
教之際以至于耕桑作息之間本末精粗公私鉅細凡
民情之所習皆

睿慮之所周視爾編氓誠如赤子

聖有謨訓明徵定保萬世守之莫能易也朕纘承大統臨
御兆人以

聖祖之心為心以

聖祖之政為政夙夜黽勉率由舊章惟恐小民遵信奉行久而或怠用申誥誡以示提撕謹將

上諭十六條尋繹其義推行其文共得萬言名曰

聖諭廣訓旁徵遠引往復周詳意取顯明語多直樸無非奉

先志以啟後人使羣黎百姓家喻而戶曉也願爾兵民等

仰體

聖祖正德厚生之至意勿視為條教號令之虛文共勉為
謹身節用之庶人盡除夫浮薄囂凌之陋習則風俗醇
厚家室和平在朝廷德化樂觀其成爾後嗣子孫並受
其福積善之家必有餘慶其理豈或爽哉

臣等謹按

聖諭十六條

聖祖仁皇帝欽頒蓋體

天牖下民之意垂教萬世我

世宗憲皇帝復欽承

至訓每條推演廣為一萬餘言詳明剴切迄今直省郡縣
朔望宣讀士民肅聽者皆踴躍鼓舞蹈德詠仁宜
乎累洽重熙億萬年共遵道路也

庭訓格言一卷

世宗憲皇帝恭編

世宗憲皇帝御製序曰欽惟

皇考聖祖仁皇帝性秉生安道叅化育臨御悠久宇宙清

寧六十載

聖德神功超越萬古凡為史臣所記注黎獻所睹聞者固已備編於

實錄

寶訓珍藏於金匱琅函
商商皇皇盛矣大矣朕曩者偕諸昆弟侍奉

宮庭親承

色笑每當視膳問安之暇

天顏怡悅倍切

恩勤提命諄詳鉅細畢舉其大者如對越

天

祖之精誠侍養

兩宮之純孝主敬存誠之奧義任人數政之宏猷慎刑重
穀之深仁行師治河之上畧圖書經史禮樂文章之淵
博天象地輿厯律步算之精深以及治內治外養性養
身射御方藥諸家百氏之論說莫不隨時示訓遇事立

言字字切於身心語語垂為模範蓋由我

皇考質本生知而加以好學聖由天縱而益以多能舉天地間萬事萬物之理融會貫通以其得之于心者宣為至教視聽言動悉合經常飲食起居咸成矩度而

聖慈篤摯啟迪周詳涵育薰陶循循善誘朕四十年來祇聆默識夙夜凜遵仰荷纘承益圖繼述追思疇昔天倫之樂緬懷丁寧告戒之言既歷歷以在心尚洋洋其盈耳謹與誠親王允祉等紀錄各條萃會成編恭名為

庭訓格言於戲

聖謨弘遠包涵無際以今所紀揆昔所聞僅存什一於千百闕畧甚多實深愧悚然而編也文詞精要意旨深長苟能引伸而擴充之則片語能涵衆議隻字可括千言雖卷帙簡約而格致誠正修齊治平之道罔弗兼該堯舜禹湯文武周孔之傳一以貫之矣爰奉秘集壽之琬琰以昭垂于億萬世書曰監于先王成憲其永無愆詩曰貽厥孫謀以燕翼子勗哉後嗣恪循

祖訓念茲罔斁受益靡窮世世子孫尚其永久敬承哉謹
序

臣等謹按是編凡二百四十有六則皆追述

聖祖仁皇帝天語蓋我

世宗憲皇帝夙齡典學

至孝性成既于

龍樓問視之餘親承

溫諭而真源默契

至德同符以古帝之心傳為

聖人之家法故編摩

寶帙義蘊宏宣垂諸萬禩固與典謨訓誥同如日月之經

天矣

御製日知薈說四卷

乾隆元年

皇上御撰

皇上御製序曰日知薈說者取予嚮日日課所為文刪

擇編次合而錄之爰定之以名也予稟承

庭訓懋學書齋流連往復於六經四子之書求其義蘊精
微旁搜諸史通鑑攷定得失區明法戒以至儒先緒
論詞苑菁華莫不遍覽雖究心探索饜飫其中然考
之古聖賢躬行實踐之學蓋慙焉而未逮自十有四
歲學屬文至于今又一紀矣其間日課詩論雜文未
嘗少輟積成卷帙瑕瑜各半踐祚以來萬幾侍理豈
復得如曩時專志篤學日與良師友敬業樂羣於翰

墨之場哉紬繹舊聞念茲弗釋因取其精去其疵錄其正棄其偏合二百六十則釐為四卷而舉凡道德性命之旨學問政治之要經傳之淵源古今之事迹莫不畧見梗概夫日知之說出自子夏繼以無忘所能必所知者日新不失而賡續以極于高明乃為學問竅要若予向日所得尚非空言而無濟實用則今班朝蒞政之間豈不足自考其知行合一與否以發抒聞見遜敏敦修乎

臣等謹按帝王之學必根于傳心之要義徵諸經世之宏謨我

皇上功崇時敏德懋日新紬繹舊聞發揮新得第一卷論帝王治化之要第二卷論天人性命之旨第三卷論禮樂法度之用第四卷論古今得失之迹臣等循環跪誦仰見

聖學高深經綸大備迄今累治重熙

化成久道尤簡冊之所未聞蓋

聖神文武之源早有以握其樞要耳

御定內則衍義十六卷

順治十三年

世祖章皇帝御定

臣等謹按是編以禮記內則篇為本分八綱三十
二子目首孝之道分子目二曰事舅姑事父母次
敬之道分子目五曰事夫勸學佐忠贊廉重賢次
教之道分子目三曰教子勉學訓忠次禮之道分

子目九曰敬祭祀肅家政定變守貞殉節端好尚
宗儉約謹言慎儀次讓之道分子目四曰崇謙退
和妯娌睦宗族待外戚次慈之道分子目五曰逮
下慈幼敦仁愛民宥過次勤之道分子目二曰女
工飲食次學之道分子目二曰好學著書凡于經
義皆詳加演繹並援引史書以資考鏡排纂既出
自

聖裁審定復仰邀

慈鑒所以端人倫之始握風化之原者胥不外乎是矣

御定孝經衍義一百卷

康熙十九年翰林院學士兼禮部侍郎葉方鵠等

奉

敕撰

聖祖仁皇帝御製序曰朕緬惟自昔聖王以孝治天下之義而知其推之有本操之有要也夫孝者百行之原萬善之極書言奉先思孝詩言孝思惟則明乎為天之經

地之義人性所同然振古而不易故以之為已則順而
祥以之教人則樂而易從以之化民成俗則德施溥而
不匱帝王奉此以宰世御物躬行為天下先其事始於
寢門視膳之節而推之於配帝饗親覲光揚烈誠萬民
而光四海皆斯義也孔子教孝之言散見于冊籍而統
會於孝經曾子以純孝親承斯訓其詞約其旨遠條貫
終始綜括羣論言孝之義于斯為備自顏芝藏本出於
漢初考注箋釋代有其人如孔安國鄭康成皇侃邢昺

輩無慮百餘家大約皆訓詁章句辨論古今文同異而求其推廣義蘊達之于萬事萬物而皆莫出其範圍者則尚未之備也

世祖章皇帝弘敷孝治懋昭人紀特命纂修孝經衍義未及成書朕續承先志詔儒臣蒐討編輯仿宋儒真德秀大學衍義體例徵引經史諸書以旁通其說竊以仲尼稱至德要道以順天下又曰教之所由生而後詳列天子諸侯卿大夫士庶人之五孝此則一經之大旨亦猶

大學之言明德新民格致誠正修齊治平也是故衍至德之義則仁義禮智信之說備矣衍要道之義則君臣父子夫婦昆弟朋友之倫備矣衍教所由生之義則禮樂政刑之屬備矣衍五孝而皆以愛敬為本明貴賤之所同也由天子之敬親推之則郊丘宗廟典禮之義備矣由天子之愛親推之則仁民育物撫綏愛養之義備矣無非敬也無非愛也即無非孝也邇而至于諸侯之不驕不溢卿大夫之法服法言法行士庶人之忠順事

上謹身節用何一非愛敬之義推而極之通于神明貫乎天地夫寧有涯際乎哉書成凡一百卷鏤板頒行併製序言冠于簡端庶幾嘉與海內共遵斯路家修子弟之職人奉親長之訓協氣旁流休風四達以成一代敦厚鴻龐之治斯則朕繼述

先烈尊經崇本之志也夫

臣等謹按是書仿真德秀大學衍義體例卷首衍經之序述經之旨二篇不入卷數次衍至德之義

以五常分五子目次衍要道之義以五倫分五子
目次衍教所由生之義以禮樂政刑分四子目次
天子之孝以愛親敬親為綱愛親分子目十二敬
親分子目十四次諸侯之孝分子目四次卿大夫
之孝分子目五次士之孝分子目四次庶人之孝
分子目三亦始于愛親敬親末二卷終之以大順
之徵體用賅而本末備而于帝王錫類推闡尤詳
迄今

孝治光昭萬方嚮化所以揚至德之休而隆太和之象者
則皆是編有以潛孚而默化也

御纂性理精義十二卷

康熙五十六年

聖祖仁皇帝御定

聖祖仁皇帝御製序曰朕自沖齡至今六十年來未嘗少
輟經書唐虞三代以來聖賢相傳授受言性而已宋儒
始有性理之名使人知盡性之學不外循理也故敦好

典籍於理道之言尤所加意臨蒞日久玩味愈深體之身心驗之政事而確然知其不可易前明纂修性理大全一書頗謂廣備矣但取者太繁相類者居多凡性理諸書之行世者不下數百朕實病其矛盾也爰命大學士李光地詮釋進覽授以意旨省其品目撮其體要既使諸儒之闡發不雜於支蕪復使學者之披尋不苦于繁重至于圖象律厯性命理氣之源前人所未暢發者朕亦時以已意折衷其間名曰性理精義頒示天下讀

是書者自有所知也已

臣等謹按性理之名昉于朱子門人陳淳撰性理字義及熊剛大性理全書迨明成祖命胡廣等纂輯性理大全支離冗碎無復體裁我

聖祖仁皇帝特詔大學士李光地等刊正其書復

親加釐定裁汰謹嚴所取雖約而全書綱領已具按語出自

聖裁發前人所未發至諸儒解說亦擇而存之其有舊書

見遺者並多採入盡性窮理之學斯為闡發無遺
矣

御纂朱子全書六十六卷

康熙五十二年

聖祖仁皇帝御定

聖祖仁皇帝御製序曰唐虞夏商周聖賢迭作未嘗不以
文字為重文字之重莫過五經四書每覽古今凡傳於
世者代不乏人秦漢以下文章議論無非因時制宜諷

諫陳事繩愆糾繆補偏救弊之計耳若夫文辭之雄摛藻之麗古人已有定論予何敢言但不偏于刑名則偏于好尚不偏于楊墨則偏于釋道不偏于詞章則偏于怪誕皆不近于王道之純予少時頗好讀書祇以廣博華瞻為事剛勇武備為用自康熙三十五年天山告警朕親擐甲胄統數萬子弟深入不毛沙磧之水瀚海指揮如意破敵無存未十旬而凱旋可謂勝矣後有所悟而自問兵可窮乎武可黷乎秦皇漢武英君也因必欲

勝而無令聞或至不保者豈非好大喜功與亂同道之
故耶所以宵旰孜孜思遠者何以柔近者何以懷非先
王之法不可用非先王之道不可為反之身心求之經
史手不釋卷數十年來方得宋儒之實據雖漢之董子
唐之韓子亦得天人之理未及孔孟之淵源至邵子而
玩索河洛之理性命之微衍先天後天之數定先甲後
甲之考雖書不盡傳理亦顯然矣周子闡無極而太極
復著通書其所授受有自來矣如星辰繫于天而各有

其位不能掩也光風霽月之量又不知其何似二程之
充養有道經天緯地之德聚百順以事君親前儒已誦
之矣至于朱夫子集大成而繼千百年絕傳之學開愚
蒙而立億萬世一定之規窮理以致其知反躬以踐其
實釋大學則有次第由致知而平天下自明德而止于
至善無不開發後人而教來者也五章補之于斷簡殘
篇之中而一旦豁然貫通之為要雖聖人復起必不能
逾此問中庸名篇之義則不偏不倚無過不及之名未

發已發之中本之於時中之中皆先賢所不能及也若
語孟則逐篇討論皆內聖外王之心傳於世道人心之
所關匪細如五經則因經取義理正言順和平寬弘非
後世淺見而輕議者同日而語也至于忠君愛國之誠
動靜語默之敬文章言談之中全是天地之正氣宇宙
之大道朕讀其書察其理非此不能知天人相與之與
非此不能治萬邦於衽席非此不能仁心仁政施於天
下非此不能外內為一家讀書五十載只認得朱子一

生居心行事故不揣粗鄙無文而集各書中凡屬朱子之一句一字命大學士熊賜履李光地素日留心于理學者彙而成書名之朱子全書以備乙夜勤學雖未能幾於寡過亦自勉君親之責者朕又思朱子之道五百年未有辨論是非凡有血氣皆受其益朕一生所學者為治天下非書生坐觀立論之易朕集朱子之書恐後世謂借朱子之書自為名者所以朕敬述而不作未敢自有議論往往見元明至于我朝注作講解萬不及朱

子而各出已見每有駁雜反為有玷宋儒之本意況天下至大兆民至衆輿圖甚遠開地太廣諸國外蕃風俗不同好尚各異防此失彼之患不可不思若以智謀要結人心如挾泰山而超北海也以中正仁義老成寬信似乎近之凡讀是書者諒吾志不在虛詞而在至理不在責人而在責已求之天道而盡人事存吾之順沒吾之寧未知何如也

臣等謹按朱子語錄甲於南宋諸儒卷帙至為繁

富咸淳中黎靖德刪除重複編為一集尚得一百四十卷蓋記載既非一手編次亦不在一時故或雜以蕪詞參以臆說即間有親受師傳確乎可據者亦因年歲之後先致異同之錯出其意欲以尊朱子而不知於朱子之本旨早已背而馳矣我

聖祖仁皇帝萬幾之暇辨析精微

特命大學士熊賜履李光地等芟除榛槁採掇菁英以類排比分門一十有九蓋鎔金質純琢玉瑕去不依

達于朱子之書者乃所以表章朱子之學也已

御定執中成憲八卷

雍正六年

世宗憲皇帝御定

皇上御製序曰惟我

皇考法天行健一日萬幾宵旰不遑猶以其間

簡命儒臣採錄經史子集所載自古帝王元德顯功訐謏

大訓以及名臣奏章先儒語類深切治道者次第進

呈

皇考親為刪定命曰執中成憲始于雍正六年仲春成于
十三年仲夏未及刊布而我

皇考遽遐棄臣民予小子熒熒在疚未之前見也嗣統既
月勉從諸臣請躬蒞庶政始發而讀之既卒業然後
知

聖心聖學實與堯舜孔子同揆而汲汲于是編則專以啟
迪我後人示之標準也間嘗殫思大學一書竊見仲

尼祖述堯舜之實義焉其所謂明德者即虞書所謂
道心也所謂明明德者懼其為人心所蔽也所謂格
物致知者嚴辨人心道心之界以盡萬事萬物之理
即書所謂惟精也所謂正心誠意者力祛人心之雜
以致道心之純即書所謂惟一也所謂修身齊家治
國平天下而止於至善者即書所謂允執厥中也然
極乎執中之量則惟堯舜為無歉而中之散見于萬
事萬物者則不惟三代聖王即秦漢以後仁厚英哲

之君下及中主亦必有一事二事之合焉不獨皋夔
益契伊傅周召孔曾思孟即近代羣儒文士亦必有
一話一言之合焉故中庸曰舜好問而好察邇言執
其兩端用其中於民蓋中之理無事無物而不具亦
無人而不知是即明德之根於性而不息者而惟舜
能察之惟舜能執之惟舜能用之故善與人同合德
於天地我

皇考編定是書自二帝三王之事古聖賢之言下逮羣儒

文士之可節取者兼收而不遺用是道也

皇考之治天下無一事不審其則無一物能匿其情即書
所謂惟精大學所謂物格而知至無一時之不散無
一念之不誠即書所謂惟一大學所謂心正而意誠
故凡施於政教者或予或奪或寬或嚴或抑揚遲速
之稍有不同而無不立乎大中可為民極即書所謂
執中大學所謂身修家齊國治天下平而明德新民
皆止于至善也而所以立綱陳紀更化善治其大者

皆斷自

聖心而細者亦博採於衆議有其人不能皆入于善而一
言之中必不廢焉即中庸所謂好問好察執兩用中
也然我

皇考聰敏睿智夙具於

聖性而養成於

聖學者已數十年故

皇考之惟精乃不思而得

皇考之惟一乃不勉而中

皇考之執中而化成天下乃從容中道無為而成豈復有

資於是書所以

親為刪定者正恐在後之侗懵然無見于執中立極之道
爰示之以成憲也豈惟予小子奉以終身惟日兢兢
無敢踰越哉世世子孫苟能服膺勿失而溯其淵源
則於堯舜孔子之道一以貫之矣豈惟君人者舍是
無以建其有極以消天下之偏陂反側哉凡百有位

果能是訓是行則上之可輔理成化以著勲猷而下亦可以謹身而寡過於以謨明弼諧共臻喜起明良之盛無難矣

臣等謹按是書前四卷錄歷代帝王嘉言善政上溯帝堯下迄明孝宗後四卷則諸臣論說亦自唐虞以至有明皆有裨于治道者蓋我

世宗憲皇帝夙夜單心闡明帝學

鑒觀千古撰定鴻編所以

貽燕翼之謀而鞏丕基之緒者是書實與謨典同功彼帝
範君鑒諸編烏足仰窺萬一哉

御覽經史講義三十一卷

乾隆十四年協辦大學士蔣溥等奉

敕編

臣等謹按講義盛于南宋解經論史循文衍說皆
經筵所陳也其更番奏御者謂之故事先引古書
次列論斷凡以闡明義理評論是非我

皇上御極之二十年

特詔翰林詹事六科十三道諸臣輪奏講義或標舉經文或節取史事皆下列先儒義疏闡明理蘊辨析異同畧如宋人故事之例因

詔大學士蔣溥等編為此帙併以

睿論改定者恭錄簡端

欽定古今儲貳金鑑六卷

乾隆四十八年奉

敕編

臣等謹按是書裒輯自周代以迄元明凡冊立儲貳義關鑒戒者備臚事實如宋之太弟明之太孫亦從附載以正史為据列案語于後卷端恭錄

聖諭謂立儲一事較封建井田之必不可行尤為過之
洞鑒古今垂為

成憲所由演慶於萬年也

理學傳心纂要八卷
歲寒居答問二卷
附錄

一卷

孫奇逢撰奇逢見經類

奇逢自述曰門宗分裂使人知反而求之事物之際晦翁之功也然晦翁歿而天下之實病不可不洩詞章繁興使人知反而求之心性之中陽明之功也然陽明歿而天下之虛病不可不補

臣等謹按奇逢淵源于姚江故推崇甚至然其講學能參酌朱陸之間而持以篤實和平主于明體

達用纂要原書凡七卷門人漆士昌復刪削其語
錄攬入之共為八卷答問二卷則與友人贈答之
詞竒逢以顧憲成當古今第十一人士昌又以竒
逢當古今第十二人殆猶不免東林標榜之習

潛室劄記二卷

刁包撰包見經類

臣等謹按是書乃包以平日所見隨筆劄記中有
云為蓋世豪傑易為愜心聖賢難又云趨吉避凶

盖言趨正避邪若認作趨福避禍便誤王士禎嘗稱之然所言心性及格致誠敬多不出前人窠臼

聖學入門書

無卷數

陳瑚撰瑚字言夏號確菴太倉人前明崇禎壬午

舉人

藤陰劄記

無卷數

學約續編十四卷 考正晚年

定論二卷 明辨錄二卷

孫承澤撰承澤見經類

承澤學約續編自記曰學約于二程同時不入堯夫考亭同時不入南軒東萊故是編亦不入月川楓山後渠涇野念菴涇陽少墟諸家

臣等謹按承澤學宗程朱自訂其講學之語一百餘條為藤陰劄記大旨深詆姚江而旁涉史事又嘗輯周程張朱之言為學約一編茲復取明薛瑄胡居仁羅欽順高攀龍四家之語倣近思錄之例訂為一集以續之又以王守仁所作朱子晚年定

論不足為據乃取朱子年譜行狀文集語類等書
詳為考正至斥守仁為吾道莽莖惟事智術籠罩
並無實學是則門戶之見錮于中不顧其立說之
已甚矣

紫陽通志錄四卷

高世泰撰世泰見史類

臣等謹按徽州汪知默等輯其紫陽書院講會之
語名曰理學歸一寄示世泰而孫承澤以學約續

編魏喬介以知統翼錄亦先後寄至世泰因并取
刀包潛室劉記陳揆省心日記諸條合以授梓謂
足通彼此應求之志名之曰通志云

學言三卷

白允謙撰允謙字子益陽城人前明崇禎癸未進
士改庶吉士入

國朝授秘書院檢討官至刑部尚書

此菴語錄十卷

胡統虞撰統虞字孝緒武陵人前明崇禎癸未進士入

國朝官至國子監祭酒

張界軒集八卷

張時為撰時為字景明餘千人前明貢生

存性編二卷 存學編四卷 存治編一卷 存

人編一卷

顏元撰元字渾然號習齋博野人

臣等謹按四存編之說主於勵實行濟實用亦介然自成一家然于宋儒多所不滿不自知其矯枉過正至存治編欲復井田封建之法尤為不達時務又按元父戌歿遼東元嘗跋涉險阻覓骨錦州奉以歸葬世稱其孝蓋獨行可嘉而講學則不盡足法也

教民恒言一卷 致知格物解二卷 周程張朱

正脈

無卷數

論性書二卷 約言錄二卷

魏裔介撰裔介見經類

裔介自序周程張朱正脈曰周海門所輯程門微
旨王陽明所輯朱子晚年定論未足發蒙啟迷於
微旨取十之五於王陽明所輯則盡刪之而取北
海考正定論云

性圖一卷

黃采撰采字亮公號復堂南城人

學案一卷

王姓撰姓字無量金壇人

續近思錄二十八卷

鄭光義撰光義字夕可無錫人

光義自序畧曰不有朱子孔子之道不著不有高子朱子之道不著朱子依然一孔子高子依然一朱子朱子功不在孟子下高子功不在朱子下

臣等謹按先儒輔翼後進在于申明聖賢緒論不務為標榜之習蓋宗孔者莫如朱至即擬朱子於

孔子恐朱子亦未能安也

朱子聖學考畧十卷

朱澤澐撰澤澐字止泉寶應人

廣祀典議一卷

吳肅公撰肅公見經類

二程學案二卷 明儒學案六十二卷

黃宗羲撰宗羲見經類

臣等謹按宗羲之學本于姚江嘗以二程造德各

殊乃輯語錄及先儒議論各為一卷其子百家又附以已意名之曰學案然辨香所在究不能掩其畛域之見云

讀書質疑二卷 欲從錄十卷

王鉞撰鉞見史類

臆言四卷

朱顯祖撰顯祖見史類

日知錄三十二卷

顧炎武撰炎武見經類

炎武自記曰自少讀書有所得輒記之其有不合時復改定或古人先我而有者則遂削之積三十餘年乃成一編

思辨錄輯要三十五卷

陸世儀撰世儀字道成號桴亭太倉人江南通志列之儒林傳中

世儀自述曰天下無講學之人此世道之衰天下

皆講學之人亦世道之衰嘉隆之間書院徧天下
呼朋引類動輒千人附影逐聲廢時失事甚有借
以行其私者此所謂處士橫議也又曰今所當學
者正不止六藝如天文地理河渠兵法之類皆切
於用世不可不講俗儒不知內聖外王之學徒高
談性命無補於世所以來迂拙之誚也

臣等謹按世儀辨諸儒之得失持論和平於制度
儀象多所闡發盖有志於實用之學而不徒相尚

以空言也

小學集解六卷

蔣永修撰永修見經類

臣等謹按古所稱小學皆爾雅方言及六書訓詁而已至朱子以小學對大學勒成一書多切于身心日用之言義類當屬儒家顧馬考不載而載孔叢子於儒家附家語及晦菴語類于論語今更定之而附識于此

儒宗理要二十九卷

張能鱗編能鱗見經類

理學辨一卷

王庭撰庭字言遠嘉興人順治己丑進士官至山西布政使

譚旭謀道續錄曰王言遠理學辨据其所言宋代直無完儒如程子性即理等說邵子道為太極等說張子鬼神二氣良能等說一例譏彈而其闢朱

子也尤甚又謂老子是易之坤道儒者是易之乾道和合三教全無義理其他支離散碎并取陸王之說者尤難縷述

常語筆存一卷

湯斌撰斌見史類

臣等謹按是編即湯子遺書中語錄一卷乃其子溥及門人姚岳生等所追記者凡二十餘條蓋初出別行之本

理學要旨

無卷數

耿介撰介見史類

湖流史學鈔二十卷

張沐撰沐見經類

沐自述曰是編取水哉之義故名曰湖流

臣等謹按是編首敦臨堂錄次關中錄次高高錄
次鈞談錄次燕邸錄次蜀中錄次天中錄共十八
卷及雜論二卷皆其講學之語實非史論而名之

曰史學則未知其所取也

下學堂劄記三卷 開道錄三卷

熊賜履撰賜履見史類

賜履自序劄記曰佔畢之餘偶有所測自戊戌迄甲子積若干卷昔河東薛氏仿橫渠正蒙之義著正續讀書錄後餘干之居業泰和之困知皆有為而作履不敏亦猥附於前人論著之意焉

朱子學歸二十三卷

鄭端編端見史類

端自序畧曰少讀朱子近思錄而求明儒高攀龍
所編朱子節要數年不得及此書既成復得節要
一冊取以相質亦不至大相刺謬云

性理譜五卷

蕭企昭撰企昭字文超漢陽人順治丁酉副榜貢
生

朱子語類纂十三卷

王鉞撰鉞見史類

臣等謹按鉞有世德堂遺書此即其第五種蓋摘錄黎靖德所編朱子語類中理氣鬼神性理論學四門四門之外又各刪存大畧而時以已說附之小學分節二卷

高熊徵撰熊徵字渭南岑溪人順治庚子副榜貢生官至浙江都轉鹽運使

小學纂注六卷

高愈撰愈見經類

華學泉序曰小學有注舊矣然或沿襲他經之解而本義莫彰櫛比字句之間而條理鮮貫愈本陳氏舊注而正其得失節其繁冗如周禮智仁聖義忠和易忠為中之類皆足正經文之誤也

大儒粹語二十八卷

顧棟南編棟南字季任又字未餘吳江人

皇朝文獻通考卷二百二十五

欽定四庫全書

皇朝文獻通考卷二百二十六

經籍考 十六

子 儒家 法家

紫陽大指八卷

秦雲爽撰雲爽字開地號定叟錢塘人

臣等謹按是編專為王守仁朱子晚年定論而作
分八門一曰朱子初學二曰論已發未發三曰論

涵養本原四曰論居敬窮理五曰論致知格物六曰
論性七曰論心八曰論太極

會語支言四卷

陸鳴鰲撰鳴鰲字石菴仁和人官河陽縣知縣

太極圖說註解

無卷數

陳兆成撰兆成字慎亭常熟人

兆成子魯附記曰是書與所注叅同契互有異同
是刻可分為二可合為一

小學句讀記六卷

王建常撰建常見經類

雙橋隨筆十二卷

周召撰召字公右號拙菴衢州人官陝西鳳翔縣知縣

召自序曰老生常談誠不足採而藥石之言原以鍼砭兒輩與世無關所自矜者集中大意在於信道而不信邪事人而不事鬼言理而不言數崇實

而不崇虛竊以為獨立之見若中流一砥也

讀朱隨筆四卷 三魚堂賸言十二卷 松陽鈔

存二卷 問學錄四卷 學術辨一卷

陸隴其撰隴其見經類

楊開基序松陽鈔存曰問學錄為中年之書此本
為晚年手定之書

隴其孫申憲識曰儀封張孝先刻大父書四種惟
讀禮識疑讀朱隨筆為定本松陽鈔存及問學錄

均刪節失真云

臣等謹按隴其之學一以朱子為宗為

國朝第一醇儒於朱子之書誠能潛心體察洞悉精
微非徒以耳食為事者讀朱隨筆一編正其生平
得力所在臚言乃其緒餘而於名物訓詁典章度
數無不考求原委辨別精深凡漢注唐疏在講學
家久視為陳言亦皆潛心研索參考是非其論朱
陸異同平心辨析未嘗依違於疑似之間所謂中

有所得之言也松陽鈔存乃其宰靈壽時所輯以
靈壽為古松陽地故名至問學錄一編大旨亦力
闢良知之說也

注解正蒙二卷 榕村語錄三十卷

李光地撰光地見經類

臣等謹按李光地學宗朱子而能心知其意得所
變通其詁經講學博引漢唐之書亦不廢陸王之
說至於疑似之介則必為剖析詳明嘗因張子正

蒙有未發之意及諸儒論說之異同撰為注解至
語錄為其門人徐用錫及其孫清植所輯冠以經
書總論與論四書者為八卷論易書詩三禮春秋
孝經者為九卷論六子諸儒諸子道統者為三卷
論史者為一卷論歷代者為一卷論學者為二卷
論性命理氣者為二卷論治道者為二卷論詩文
者為二卷而以韻學附於後又光地博涉羣書精
於律呂算術而是編不載豈以非儒者之所急歟

或清植等不及聞也

信陽子卓錄八卷

張鵬翮撰鵬翮見史類

教習堂條約一卷

徐乾學撰乾學見經類

萬世玉衡錄四卷

蔣伊撰伊字謂公常熟人康熙癸丑進士官至河南

提學副使

臣等謹按是編所採自唐虞以迄有明分門編次
為類六十有四取天官書玉衡為北斗杓之義名
之曰萬世玉衡伊嘗恭錄是書進呈

御覽故以進書奏疏冠於卷首焉

儒門法語

無卷數

彭定求撰定求見史類

臣等謹按定求好明人高攀龍之學意在調劑諸
說不為矯激之言

正學隅見述一卷

王宏撰撰宏撰見經類

宏撰自述曰予素信朱子惟於無極太極之說小異誠不敢以心之所不安者徒剿襲雷同以蹈於自欺欺人之為

臣等謹按周子無極之旨朱子格物之說陸九淵王守仁先後攻擊遂令數百年來大開聚訟之門詬爭不已此書於格物之說則遵朱子無極之說

則主九淵持論確有所見固不僅為調停之論已也

太極圖說論十四卷

王嗣槐撰嗣槐字仲昭錢塘人康熙己未薦舉博學鴻詞不及與試授內閣中書舍人以歸

太極圖集注一卷

孫子昶撰子昶號主一聞喜人康熙己未進士官

垣曲縣知縣

性理大中二十八卷

應撓謙撰撓謙見經類

臣等謹按呂祖謙題近思錄懼學者驚於高遠以陰陽性命之說錄於首卷而致知力行之方反錄於後撓謙祖其意故增損大全以成此本亦以太極圖說退於末卷

憤助編二卷

蔡方炳撰方炳見史類

體獨私鈔四卷 王劉異同五卷

黃百家撰百家字主一餘姚人

王學質疑一卷附錄一卷

張烈撰烈見經類

太極圖說遺議一卷

毛奇齡撰奇齡見經類

洪範皇極補六卷

劉世衢撰世衢字何甫永新人

二程語錄十八卷 小學集解六卷 續近思錄

十四卷 濂洛關閩書十九卷 學規類編二十

七卷 性理正宗四十卷 廣近思錄十四卷

困學錄集粹八卷

張伯行撰伯行見史類

伯行自序性理正宗曰性理大全一書雜採天文
地志律歷兵機識緯術數之學及釋家叅同契縱
橫家言概有取焉未免失之駁而不純因刪其繁

蕪補其闕畧遵道統以清其源述師傳以別其派
爰取周程張朱五子以下及元明諸儒之言分類
次之

程書五十一卷

程湛編湛爵里未詳

臣等謹按是編錄程氏遺書外書及明道文一卷
其序次與朱子不同

小學集解六卷

黃澄撰澄字庭聞莆田人康熙中諸生

理學正宗十五卷

竇克勤撰克勤字敏修號敬菴柘城人康熙戊辰

進士官翰林院檢討

家語正義十卷 孔叢子正義五卷

姜兆錫撰兆錫見經類

臣等謹按毛晉汲古閣家語刊本篇目次第悉仍

王肅之舊兆錫好為變古編次悉從葛鼎之本至

孔叢子正義雖偶有考訂亦未免拘墟之見

大學辨業四卷 聖經學規纂二卷 論學二卷

小學稽業五卷

李塉撰塉見經類

塉自述例畧曰辨業意有不盡者入之學規學規意有不盡者入之論學

又自序小學稽業曰朱子小學所載天道性命上達也親迎朝覲年及壯强者也以及居相告老諸

條皆非幼童事且無分於大學乃別輯此編

性理纂要八卷 天理主敬圖一卷

冉覲祖撰覲祖見經類

覲祖自序性理纂要曰前四卷為附訓者周子太極圖通書張子西銘東銘程子定性書五者之訓詁太極圖通書西銘本朱子之注諸儒之說東銘定性書則禱考朱子及諸儒之說而叅以己意後四卷為附評者以程子之言為經朱子之言為傳

諸儒為之羽翼而以己意為之評

程功錄五卷

楊名時撰名時見經類

嵩陽學凡六卷

景日昡撰日昡見史類

續小學六卷

葉鈐編鈐號潛夫嘉善人

心印正說三十四卷

吳台碩撰台碩字位三嘉定人陸隴其之門人

臣等謹按是書以學術治功之要分立篇目凡三十四類心印二字固非儒語說序二篇亦涉擬經顧隴其作序時未之糾正則不可解耳

餘山遺書十卷

勞史撰史字麟書號餘山餘姚人

臣等謹按是書曰格致錄曰學庸廣義曰邇言及稊文史多本易理以推人物之性史以實踐為務

此其緒餘也

虛谷遺書三卷

何國材撰國材字維楚江西新城人

筆記二卷

程大純撰大純字漢舒孝感人康熙中由貢生官
黃岡縣教諭

大純自序畧曰陸王之學雖矯枉過正然用以教
口耳之學不為無功

周子疏解四卷

王明弼撰明弼見經類

日省編一卷

馮昌臨撰昌臨見經類

尊道集四卷

朱寧撰寧字良一黃陂人

近思續錄四卷 冷語三卷 讀書日記六卷

劉源涿撰源涿字崑石自號直齋安邱人

馬恒謙序近思續錄曰先生於朱子文集或問語類
三書沈潛反覆撮輯纂叙席不暇煖手不停筆二
十餘年凡三創草三脫稿乃成是書
性理辨義二十卷

王建衡撰建衡見史類

臣等謹按是書分十有五目曰原理原氣原天原
生物原性原命原道原德原倫原學原鬼神原人
鬼原祭原妖厲禡論大旨皆複衍宋儒之說其原

天三篇則以歐羅巴語為藍本也

靜用堂偶編十卷

涂天相撰天相字燮菴號存齋一號迂叟孝感人
康熙癸未進士官至工部尚書

三子定論五卷

王復禮撰復禮見經類

正修錄三卷齊治錄三卷

于準撰準字萊公永寧人江南總督成龍子官至

江蘇巡撫

臣等謹按是編因其父成龍襍鈔之稿與蔡方炳
編次增益之凡例稱成龍不從理學中立名絕無
胸中彼此異同之見又稱成龍不佞佛亦不闢佛
其言尤明白正大成龍一生之學力具見矣

廣字義三卷

黃叔璥撰叔璥見史類

臣等謹按孫承澤嘗增訂宋陳普所作字義叔璥

復取陳淳北溪字義及程若庸字訓合承澤所訂
彙為是編凡普之舊題標以原字其續增者則標廣
義以別之因祇取性理諸字推演其義故列於此
朱子晚年全論八卷 陸子學譜二十卷
李紱撰紱見史類

學舫

無卷
數

吳雲撰雲見史類

白鹿洞規條目二十卷

集程朱格物法一卷 集

朱子讀書法一卷

王澍撰澍見經類

太極解拾遺一卷通書解拾遺一卷後錄一卷

西銘解拾遺一卷後錄一卷 正蒙集解九卷

近思錄集解十四卷

李文炤撰文炤見經類

經書性理類輯精要錄六卷

王士陵撰士陵見經類

衍範二卷

顧昌祚撰昌祚號忍園婁縣人康熙中由舉人官
江夏縣知縣降補萊州府經歷

謀道續錄二卷

譚旭撰旭字東白新建人康熙丁酉副榜貢生

讀周子劄記

無卷
數

崔紀撰紀見經類

臣等謹按是書以中庸之旨發明太極圖說通書

之理蓋本明薛瑄說而益推衍之

正蒙初義十七卷

濂關三書

無卷數

皇極經世

解八卷

王植撰植見經類

植皇極經世解識畧曰皇極者三皇之君極邵子

大意在發明先天之易所謂先天之學也經世即

元會運世也內篇十二首即觀天地次言觀聖人

次言觀萬物以下遞及古今君臣名物對道而言

無不可曰物也外篇言理言數處尤難領會因於
卷七之首附以臆說一篇至元會運世三篇後即
繼以聲音唱和邵子以為可盡萬物之類非字書
韻書可比尤宜詳之

近思錄集注十四卷

茅星來撰氏籍未詳

星來自序曰自宋史分道學儒林為二而言程朱
之學者但求之身心性命之間不復以通經學古

為事蓋嘗竊論之馬鄭賈孔之說經譬則百貨之所聚也程朱諸先生之說經譬則操權度以平百貨之輕重長短者也微權度則貨之輕重長短不見而非百貨所聚則雖有權度亦無所用之故欲求程朱之學者其必自馬鄭諸傳疏始愚於是編備著漢唐諸家之說以見程朱諸先生學之有本俾彼空疏寡學者無得以藉口焉

知非錄一卷

鄧鍾岳撰鍾岳字東長號悔廬聊城人康熙辛丑進士第一官至禮部左侍郎

大學衍義輯要六卷 大學衍義補輯要十二卷

呂子節錄四卷補遺二卷

陳宏謀撰宏謀字汝咨號榕門臨桂人雍正癸卯進士官至大學士諡文愷

聖學輯要一卷

潘繼善撰繼善見經類

載道集六十卷

許煒撰煒字純也海寧人雍正癸卯進士官翰林院編修

皇極經世考三卷

徐文靖撰文靖見經類

臣等謹按是編首列二圖一曰數皆不離於五圖一曰皇極經世一元圖蓋即邵子起算之術皆隲括王湜節要為之末附三十六宮解而證以鄭康

成乾鑿度注及黃帝素問太乙遊九宮之語因邵
子之說而偶及之者也

恥亭遺書十卷

周宗濂撰宗濂字簡菴華亭人雍正癸卯拔貢生

官潛山縣教諭

太元別訓五卷

劉斯組撰斯組見經類

棉陽學準五卷 女學六卷

藍鼎元撰鼎元見史類

鼎元女學識畧曰自班氏女誡以外若劉向列女傳擇而不精鄭氏女孝經精而不詳至女訓女史閨範女範等書尤為鄙俚淺率因採掇經傳格言參摭史傳分為德言容功四篇章區類別間綴以論斷焉

易範同宗錄

無卷數

李灝撰灝字柱文卷首自署曰南豐又署曰嘉禾

張子淵源錄十卷

張鏐撰鏐號紫峰樂陵人雍正壬子舉人

讀書偶記三卷

雷鉉撰鉉字貫一寧化人雍正癸丑進士官至副都御史

臣等謹按是編大旨惟以朱子為宗書中論易多本李光地論禮多本方苞蓋其讀書時所劄記也
女教經傳通纂二卷

任啟運撰啟運見經類

躬行實踐錄十五卷

桑調元撰調元見經類

朱子為學考三卷 理學疑問四卷

童能靈撰能靈見經類

能靈自序理學疑問曰專心於先儒聖賢之旨閱

十餘年日用體驗間有所見輒自劄記而成是編

讀書小記三十卷

范爾梅撰爾梅字梅臣號雪菴洪洞人雍正中貢生

例畧曰是編記易尚書詩為完書春秋禮記周禮等皆有殘佚重複

南阿集二卷

康呂賜撰呂賜見經類

近思錄集註十四卷

江永撰永見經類

淑艾錄十四卷 下學編十四卷

祝詮撰詮字人齊原名游龍海寧人

逸語十卷

曹庭棟撰庭棟見經類

東莞學案

無卷數

吳鼎撰鼎見經類

臣等謹按陳建有學部通辨一書鼎因其排斥陸王阿附宰執因條列其說謂之詰難蓋門戶之見

深故報復之詞激也

困勉齋私記四卷

閻循觀撰循觀見經類

思通集二卷 隨意吟一卷

秦望撰望字元宮無錫人

濬元十六卷

張必剛撰必剛見經類

必剛自述曰易之卦爻彖象先事立文春秋之征

伐會盟後事立文至於歲時節候終古共是事即共是文幽明俯仰遠取近徵參伍錯綜抉摘發揮於觀象玩詞觀變玩占之義可以竊附云爾

叙天齋講義四卷

竇文炳撰文炳字質民長安人

明儒講學考一卷

程嗣章撰嗣章字元樸號南耕上元人

業儒臆說二卷

陶圻撰圻字甸方秀水人

砭身集六卷

劉鳴珂撰鳴珂見經類

愚齋反經錄十六卷

謝王寵撰王寵字愚齋陝西人

講學二卷

陳祖銘編其師李培講學語培號此菴嘉興人

三立編十二卷

王梓編梓字琴伯邵陽人官崇寧縣知縣

洪範補註五卷

潛士權撰士權見經類

洪範圖說四卷

舒俊鯤撰俊鯤字潛夫溆浦人

俊鯤自序畧曰讀

欽定易圖說得洪範九疇之數兼得八十一疇之全數於
欽定書圖說得洪範九疇之名兼得八十一疇之本名從

此衍之分元會運世四卷

性理析疑十五卷

蔡洛撰洛武平人

演極圖說四卷

秦錫淳撰錫淳字沐雲臨海人

童子問一卷 敬義錄一卷

黃文澍撰文澍見經類

理解體要二卷

黃為鶚撰為鶚宜黃人

讀白鹿洞規大義五卷

任德成撰德成字象元吳江人

朱子書要

無卷數

不著編輯者姓氏

右儒家

巡城條約一卷 風憲禁約一卷

魏裔介撰裔介見經類

臣等謹按巡城條約四十條乃喬介為左都御史時告誡五城者語多瑣屑無裨大體至風憲禁約一卷皆巡按外省規條喬介自通籍以後由京秩累遷至大學士未膺直指之任此編或其平日擬定之稿有待見諸施行者歟

折獄卮言一卷

陳士鏞撰士鏞見經類

讀律佩觿八卷

王明德撰明德字金樵高郵人官至刑部陝西司郎中

續刑法叙畧一卷

譚瑄撰瑄字子羽嘉興人康熙乙酉舉人官至給事中

疑獄箋四卷

陳芳生撰芳生見史類

芳生自序曰晉和魯公凝著疑獄集二卷其子宋

太子中允蒙增之為四卷明巡按御史張景廣之
為六卷茲復增汰之統為三卷而附和蒙及元杜
震明李崧原序於卷後末又輯昔賢論說讞獄成
法別為一卷統名疑獄箋

右法家

皇朝文獻通考卷二百二十六